

Reunir tuts Rumantschs da Landquart fin Buchs e Glaruna

L'uniun less era Ladins, Surmirans e Sutsilvans en sias retschas

■ (anr/vi) L'uniun Rezia Bassa marscha cun schlantsch vers l'avegnir. Il nov president e sia suprastanza han ina pluna ideas. Dals passa tschient commembers èn ils blers Sursilvans. Las portas per Ladins, Surmirans e Sutsilvans èn avertas, ins ha aposta scrit las statutas en tschintg idioms. Dacurt ha l'uniun fatg ina spassegiada sin il Flumserberg. Tuts èn stads inchantads, raquinta *Rinaldo Caduff*. Da la partida èn stadas passa 40 persunas – giuven e vegl, biadis cun tats e tattas. «Jau hai mez stuì smirvegljar quants geniturs che dattan oz vivanant il rumantsch», conceda il president. «Igl è ina nova generaziun da babs e mammas che dattan bregia e mussan la lingua als uffants. Uschia emprendan gist er ils partenaris tudestgs noss linguatg.» Forsa pudess l'uniun porscher in curs per ch'ils uffants emprendian era da scriver rumantsch, ponderescha il president. Quai è be ina da bleras ponderaziuns ch'el e ses suprastants *Retus Spescha* e *Lea Killias* fan.

Da Landquart fin Glaruna

Pli baud avevi anc num «Uniun romantscha da Sargans e contuorn». Il nov num «Uniun rumantscha Rezia Bassa» stat per in territori pli grond, numnadain per la regiun nua ch'il rumantsch era derasà avant blers tschientaners. Ins less uschia motivar per exempel glied da Glaruna, da l'intschess da la Linth u da la Val dal Rain fin a Buchs da far part. Era Rumantschs da Landquart n'avessan betg uschè lunsch. Per lezs fissi per exempel cumadaivel da vegnir a las emprovas da chant a Bogn Ragaz. «Il chor è atgnamain il cor da noss'uniun», di Caduff. Il presi-



«Dar gas» vul Rinaldo Caduff e porscher in'uniun attractiva a Rumantschs da tuts idioms.

dent è sez in chantadur passionà ed ils ultims dus onns è il chor creschì considerablain. Sut la batgetta dad *Eugen Casanova* exerciteschan ins ina giada il mais. Suententer la pausa da stad cumenzan las emprovas puspè ils 10 da settember a las 19.30 en la chasa da scola Kleinfeld a Bogn Ragaz. La regiuvinaziun da l'uniun sentan ins era sin www.reziabassa.ch. Probabel na datti betg in'otra uniun rumantscha che posseda ina cumparsa uschè professiunala en l'internet. *Marc Elia Solèr* ha concepì la pagina e l'actura *Lea Killias* procura per las actualisaziuns. Per far vegnir pli enconuschenta l'uniun tar Rumantschs da tuts idioms planisescha la suprastanza pliras acziuns, per exempel en il Pizolpark ed a la festa da vin a Fläsch. Plinavant lessan ins dar als commembers la pussaivladad da s'inscuntrar pli savens. L'uniun spera sin agid da la Lia Rumantscha che ha gia commu-

nitgà da vulair sustegnair meglier la diaspora.

«Tschappar en la chausa»

Rinaldo Caduff (58 onns) è creschì si a Cumbel. El ha fatg l'emprendissadi da montader da stgaudaments a Turitg ed ha lavurà suenter plirs onns a Cuira ed en Lumnezia. Avant prest trent'onns è el sa chasà a Mols e lavura oz sco manader da project. El planisescha la tecnica da stgaudament, ventilaziun e clima per gronds chasaments e bajetgs industrials. Cun sias duas figlias han el e sia dunna che deriva da Vuorz adina discurrì rumantsch ed uss dattan els vivanant la lingua als trais biadis. Questa primavaira ha l'uniun elegì Caduff sco president. El aveva prendì avant da far ina massa per l'uniun, ma duas operaziuns tut sur ura l'han franà. «Uss sun jau dentant puspè fit e pront da tschappar en la chausa e da dar gas.»

Cuschinar, lotto e viandar sin la via da chastognas a Murg

Ina schelta attractiva da spassegiadas e scuntradas fa l'uniun amogna. Era Rumantschs che n'èn betg commembers pon sa participar. Ils 9 da settember è planisada ina tura sin la via da chastognas a Murg cun gentar communabel ed ina pitschna «olimpiada» per giuven e vegl.

Il november, mintgamai la mesema saira, porscha l'anteriur cuschinier *Retus Spescha* in curs da cuschinar spaisas grischunas. Mintga giada vegn cu-

schinà in entir menu e l'ultima saira pon ils participants envidar il partenari a tschaina.

Ils 9 da november organischa la canorta a Buchs ina sairada speziala cun in referat dal nov professer rumantsch *Rico Valär*. Ils 30 da november ha lieu la saira tradiziunala da lotto.

Dapli detagls chattan ins sin www.reziabassa.ch. Annunzias prenda encunter Rinaldo Caduff, president@reziabassa.ch, 079 703 53 80.